



閩南語現代詩 教師組第一名

愛的進行曲

0.

你的身體是阮永遠的責罰
愛，只是一片美麗的風景
遙遠閣哀愁

1.

佇愛的平靜的湖中
你只是我的倒影
船過水無痕

2.

一段猶未完成的故事
穿雨衣覘入去你的身軀
愛，果然落雨矣

3.

時間一點一滴流入去手縫
愛，有一寡濕濕的臭 phú
日頭躑起來，閣墜落

4.

阮跳落去一个無解的世界
你急欲一个人生答案

愛，猶原佇真遠的所在

5.

橫直緊慢，攏是一世人
佇愛的筊桌
阮總輸了才欲走

6.

靈魂佻身體戰甲流血流滴
愛，已經無法度分別你佻我
一尾蛇 sô 過上帝冷冷的田園

7.

是啥物款的雨永遠落袂停
你悲傷吐出一口大氣
愛的珠淚，是千萬點的雪

8.

愈來愈近的形影
是愛抑是恨的記持
你的目尾 lak 落一葉哀愁

9.

阮的目矚看你的目矚
愛情的磅空內面
幸福對遙遠的所在行來

10.

愛，是一尊佛祖
佇雙腿之間
阿彌陀佛

11.

所有的愛靠佇肩胛頭
請你共阮的未來擔起來
花的芳味鑽過暗時的跂縫

12.

你是頂世人的我
踏海的風湧行來
愛，是一座無人的島嶼

13.

愛，是一條無言的歌
佇咱的面肉溫存
微微的風吹開時間的空喙

14.

咱愛的溫度
一直思考火的意義
性命只賸一枝焦焦的柴籬

15.

愛，欲按怎呼喚
你呼出一句驚天動地的懸音
烏暗的寒夜，破一空

16.

你扭曲的身軀共阮講
阮毋是一滴孤單的白露
愛，是有刺的溫暖

17.

阮是一尾魚
你的愛，洄過來
歇佇目墘，一清二楚

18.

阮妝做觀音的形影
愛的千手的慈悲的風
世界，一時消影無蹤

19.

阮火燒的熱情奔向天頂
這是花開的證明
蝴蝶期待一陣愛的小雨

作者感言



陳利成 彰化縣立埔心國中教師

母語，是族群的性命。每一個母語，攏是世界無法度替代的資產，若消失去，毋但是國家的悲哀，嘛是人類永遠的拍損。這馬，臺灣各族群的母語攏面對滅亡的危機，向望咱政府珍惜多元文化，佇十二年國民教育體制內面，有計劃來進行母語保存、推廣的工程，毋通予下一代囡仔怨嘆佢遺憾—咱這代大人變做毀滅母語的兇手……〈愛的進行曲〉，雖然是個人的私情，但是真願意化作無私的大愛，關心咱的島嶼，咱的文化，咱的語言，咱的根。感謝評審老師，聽著我心內，輕輕迴轉的戀歌……